

續修廬州府志卷二十六

花翎道銜江南安徽廬州府知府清泉黃 雲總修

名宦傳一

國史循吏下採職官省治遷廬大吏濟艱兼轄之傳宜冠  
其端守土勵治德教不刊

漢 以下兼轄

魏相字弱翁濟陰定陶人也徙平陵少學易為郡卒史  
舉賢良以對策高第為茂陵令遷揚州刺史考案郡國  
守相多所貶退相與丙吉相善時吉為光祿大夫與相  
書曰朝廷已深知弱翁行治方且大用矣願少慎事自  
重藏器於身相心善其言為霽威嚴居部二歲徵為諫

續修廬州府志

卷二十六

名宦傳一

一

大夫復為河南太守數年宣帝即位徵相入為大司農  
遷御史大夫韋賢以老病免相遂代為丞相封高平侯  
食邑八百戶神爵三年薨謚曰憲侯

漢書

黃霸字次公淮陽陽夏人也武帝未補侍郎謁者坐同  
產有罪劾免後復入穀沈黎郡補左馮翊二百石卒史  
以廉稱察補河東均輸長復察廉為河南太守丞霸為  
人明察內敏又習文法然溫良有讓足知善御眾為丞  
處議當於法合人心太守甚任之吏民愛敬焉自武帝  
末用法深繇是俗吏上嚴酷以為能而霸獨用寬和為  
名會宣帝即位聞霸持法平名以為廷尉正數決疑獄  
坐公卿大議廷中知長信少府夏侯勝非議詔書大不

敬霸阿從不舉劾皆下廷尉積三歲迺出左馮翊宋畸  
舉霸賢良勝又口薦霸於上擢爲揚州刺史三歲詔以  
霸爲潁川太守霸外寬內明得吏民心戶口歲增治爲  
天下第一徵守京兆尹三年代丙吉爲丞相封建成侯  
食邑六百戶甘露三年薨謚曰定侯漢書  
何武字君公蜀郡郫縣人也宣帝時太僕王音舉武賢  
良方正徵對策拜爲諫大夫遷揚州刺史九江太守戴  
聖行治多不法前刺史以其大儒優容之武廉得其罪  
聖懼自免後爲博士毀武於朝廷武聞之終不揚其惡  
而聖子賓客爲羣盜得繫廬江聖自以子必死武平心  
決之卒不得死聖慙服行部必先卽學宮見諸生試其

誦論問以得失然後入傳舍出記問墾田頃畝五穀美  
惡已乃見二千石以爲常初武爲郡吏時事太守何壽  
知武有宰相器以其同姓故厚之後壽兄子爲廬江長  
史時武奏事在邸壽兄子適在長安壽爲具名武見其  
兄子武曰刺史古之方伯上所委任一州表率也不可  
有所私問爲刺史五歲入爲丞相漢書

王嘉字公仲平陵人也遷大中大夫出爲九江太守治  
甚有聲徵入爲大鴻臚徙京兆尹遷御史大夫建平三  
年代平當爲丞相封新甫侯元始四年詔書追錄忠臣  
封嘉子崇爲新甫侯追謚嘉爲忠侯漢書  
房鳳字子元不其人擢光祿大夫遷五官中郎將出爲

九江太守穀梁春秋有尹胡申章房氏之學漢書  
郭稚南陽穰人成帝時為廬江太守有清名漢書

後漢

鄧晨字偉卿新野人娶光武姊元拜光祿大夫四年從  
幸壽春留鎮九江晨好樂郡職由是復拜為中山太守  
吏民稱之常為冀州高第後漢書

梁統字仲甯安定烏氏人建武十二年統詣京師以列  
侯奉朝請更封高山侯拜大中大夫在朝廷數陳便宜  
後出為九江太守定封陵鄉侯統在郡亦有治迹吏人  
畏愛之卒於官子松嗣後漢書

王景字仲通樂浪訃邯人也建初七年遷徐州刺史明

續修廬州府志 卷二十六 名宦傳一 三

年遷廬江太守先是百姓不知牛耕致地力有餘而食  
常不足郡界有楚相孫叔敖所起芍陂稻田景乃驅率  
吏民修起蕪廢教用犁耕墾闢倍多境內豐給遂銘石  
刻誓令民知常禁又訓令蠶織為作法制皆著於鄉亭

廬江傳其文辭後漢書

元賀為九江沛二郡守以清潔稱所在化行終於大司

農後漢書第五倫傳

宋均字叔庠南陽安眾人也遷九江太守郡多虎暴數  
為民患常募設檻穽而猶多傷害均到下記屬縣曰夫  
虎豹在山鼃鼃在水各有所托且江淮之有猛獸猶北  
土之有鷄豚也今為民害咎在殘吏而勞勤張捕非憂

恤之本也其務退姦貪思進忠善可一去檻穽除削課制其後傳言虎相與東渡江海中元元年山陽楚沛多蝗其飛至九江界者輒東西散去由是名稱遠進浚道縣有唐后二山民共祠之眾巫遂取百姓男女以為公嫗歲歲改易既而不敢嫁娶前後守令莫敢禁均乃下書曰自今以後為山娶者皆娶巫家勿擾良民於是遂絕永平元年遷東海相建初元年卒於家

後漢書

第五頡字子陵為郡功曹從事公府辟舉高第為侍御史南頓令桂陽南陽廬江三郡太守諫議大夫洛陽無主人鄉里無田宅客止靈臺中或十日不炊司隸校尉南陽左雄太史令張衡尚書廬江朱建孟興皆與頡故

續修廬州府志

卷二十六

名宦傳一

四

舊各致禮餉頡終不受

後漢書第五倫傳注

應融字義高汝南人安帝朝守廬江惠政及民入年拜

司隸校尉

明隆慶志

范式字巨卿山陽金鄉人也一名范舉州茂才四遷荆

州刺史廬江太守有威名卒於官

後漢書

滕撫字叔輔北海劇人也建康元年九江范容周生等相聚及亂遣御史中丞馮緄將兵督揚州刺史尹燿九江太守鄧顯討之燿顯軍敗為賊所殺又陰陵人徐鳳馬勉等復寇郡縣攻沒合肥明年廣陵賊張嬰等復聚眾數千人反據廣陵朝廷博求將帥三公舉撫有文武才拜為九江都尉與中郎將趙序助馮緄合州郡兵數

萬人共討之斬馬勉范容周生等千五百級徐鳳遂將  
餘眾攻燒東城下邳人謝安應募率其宗親設伏繫鳳  
斬之封安爲平鄉侯邑三千戶拜撫中郎將督揚徐二  
州事撫復進擊張嬰斬獲千餘人又歷陽賊華孟攻九  
江殺郡守撫乘勝進擊破之斬孟等東南悉平後漢書  
羊續字興祖太山平陽人也辟太尉府四遷爲廬江太  
守後揚州黃巾賊攻舒焚燒城郭續發縣中男子二十  
以上皆持兵勒陳其小弱者悉使負水灌火會集數萬  
人并勢力戰大破之郡界平後安風賊戴風等作亂續  
復擊破之斬首三千餘級生獲渠帥其餘黨輩願爲平  
民使就農業徵爲太常未及行會病卒後漢書

續修廬州府志

卷二十六

名宦傳一

五

陽球字方正漁陽泉州人也辟司徒劉寵府舉高第九  
江山賊起連月不解三府上球有理姦才拜九江太守  
球到設方略凶賊殄破收郡中姦吏盡殺之遷平原相  
後漢書

服虔字子慎初名重又名祗後改爲虔河南滎陽人也  
少以清苦建志入太學受業有雅才中平末拜九江太  
守免遭亂行客病卒後漢書

盧植字子幹涿郡涿人也熹平四年九江蠻反四府選  
植才兼文武拜九江太守蠻寇賓服以病去官會南夷  
反叛以植嘗在九江有恩信拜爲廬江太守植深達政  
宜務存清靜宏大體而已歲餘復徵拜議郎後漢書

陸康字季甯吳人也舉茂才除高成令光和元年遷武陵太守轉守桂陽樂安二郡會廬江賊黃穰等與江夏蠻連結十餘萬人攻沒四縣拜康廬江太守申明賞罰擊破穰等餘黨悉降獻帝初袁術遣孫策攻康圍城數重康固守受敵二年子績幼曾謁術懷橘墮地者也後漢書

張磐字子石丹陽人以清白稱終於廬江太守後漢書度尚傳

邊讓字文禮陳留浚儀人也以高才擢進屢遷出爲九江太守不以爲能也初平中王室大亂讓去官還家恃才氣不屈曹操多輕侮之言建安中其鄉人有構讓於操操告郡就殺之文多遺失後漢書

續修廬州府志

卷二十六

名宦傳一

六

三國魏

劉馥字元穎沛國相人也避亂揚州建安初說袁術將戚寄秦翊使率眾與俱詣太祖太祖悅之司徒辟爲掾後孫策所置廬江太守李述攻殺揚州刺史嚴象廬江梅乾雷緒陳蘭等聚眾數萬在江淮間郡縣殘破太祖方有袁紹之難謂馥可任東南之事遂表爲揚州刺史馥既受命單馬造合肥空城建立州治南懷緒等皆安集之貢獻相繼數年中恩化大行百姓樂其政流民越江山而歸者以萬數於是聚諸生立學校廣屯田興治芍陂及茹陂七門吳塘諸埭以溉稻田官民有畜又高爲城壘多積木石編作草苫數千萬枚益貯魚膏數千

斛爲戰守備建安十三年卒孫權率十萬眾攻圍合肥城百餘日時天連雨城欲崩于是以苦蓑覆之夜然脂照城外視賊所作而爲備賊破走揚州士民益追思之以爲雖董安于之守晉陽不能過也及陂塘之利至今爲用子靖黃初中從黃門侍郎遷廬江太守詔曰卿父昔爲彼州今卿復據此郡可謂克負荷者也靖爲政初雖如碎密終于百姓便之有馥遺風後爲大司農衛尉封廣陸亭侯嘉平六年薨諡曰景

三國志

滿寵字伯甯山陽昌邑人也太和二年領豫州刺史三年春降人稱吳大嚴揚聲欲詣江北獵孫權欲自出寵度其必襲西陽而爲之備權聞之退還是歲寵以前將

軍都督揚州諸軍事汝南兵民戀慕大小相率奔隨道路不可禁止四年拜寵征東將軍其冬孫權揚聲欲至合肥寵表召兗豫諸軍皆集權尋退還被詔罷兵寵以爲今賊大舉而還非本意也此必欲僞退以罷吾兵而倒還乘虛掩不備也後十餘日權果更來到合肥城不克而還吳將陸遜向廬江論者以爲宜速赴之寵曰廬江雖小將勁兵精守則經時又賊舍船二百里來後尾空懸尙欲誘致今宜聽其遂進但恐走不可及耳整軍趨楊宜口賊聞大兵東下卽夜遁時權歲有來計青龍元年寵上疏曰合肥城南臨江湖北達壽春賊攻圍之得據水爲勢官兵救之當先破賊大輩然後圍乃得解

賊往甚易而兵往救之甚難宜移城內之兵其西三十里  
有奇險可依更立城以固守此爲引賊平地而掎其歸路  
于計爲便帝未許尙書趙咨以寵策爲長詔遂報聽其年  
權自出欲圍新城以其遠水積二十日不敢下船寵謂諸將  
曰權得吾移城必于其眾中有自大之言今大舉來欲要  
一切之功雖不敢至必當上岸耀兵以示有餘乃潛遣步騎  
六千伏肥池隱處以待之權果上岸耀兵寵伏軍卒起擊之  
斬首數百或有赴水死者明年權自將號十萬至合肥新城  
寵馳往赴募壯士數千人折松爲炬灌以麻油從上風放火  
燒賊攻具射殺權弟子秦賊於是引退三年春權遣兵數千  
家佃於江北

至八月寵以爲田向收熟男女布野其屯衛兵去城遠者數百里可掩擊也遣長史督二軍循江東下摧破諸屯  
焚燒穀物而還景初二年以年老徵還遷太尉謚曰

景侯

三國志

吳

駱統字公緒會稽烏傷人黃武初曹仁攻濡須統與嚴圭共拒破之封新陽亭侯後爲濡須督前後書數十上所  
言皆善權終遂行之

三國志

芮祉字宣嗣丹陽人從孫堅征討立功堅薦爲九江太

守後莅吳郡所在有聲

明隆慶志

孫河堅族子也出後姑俞氏後復姓爲孫河質性忠直



訥言敏行有氣幹少從堅征討常為前驅又從權討李

術術破拜威寇中郎將領廬江太守二國志吳宗室孫韶傳注

洪矩丹陽郡涇縣人吳時會稽太守明影宋本北堂書

書為廬江太守有清稱徵還船輕載土時歲暮逐除者鈔百三十七引吳

就乞所獲甚少矩乃語之逐除人見土而去北堂書鈔

七十五引紀義宣城記太平御覽二百六十二引宣城記同嘗勸率里黨引水溉田

以時蓄洩備旱潦今涇縣有洪陂洪堰洪塘皆其遺澤

國朝同治四年准祀鄉賢祠禮部奏案

晉

石苞字仲容渤海南皮人諸葛誕舉兵淮南苞統青州

諸軍壽春平拜鎮東將軍封東定侯假節都督揚州諸

續修廬州府志 卷二十六 名宦傳一 九

軍事武帝踐祚遷大司馬進封樂陵郡公加侍中苞鎮

撫淮南士馬強盛邊境多務苞既勤庶事又以威德服

物泰始八年薨諡曰武晉書

周浚字開林汝南安城人性果烈以才理見知有人倫

鑒識初不應州郡辟後仕魏為尚書郎晉武帝太康初

拜折衝將軍揚州刺史隨王渾伐吳以功封武成侯晉書

鄧殷襄陵人亮直疆正鍾會伐蜀奇其才自黽池令召

為主簿賈充伐吳請殷為長史後授皇太子詩為淮南

太守夢行水邊見一女子猛獸自後斷其盤囊占者以

為水邊有女汝字也斷盤囊者新獸頭代故獸頭也不

作汝陰當作汝南也果遷汝陰太守為中庶子晉書鄧攸傳

張夔清河人廬江太守陶侃早孤貧爲縣吏夔召爲督郵領樅陽令有能名遷主簿夔妻有疾將迎醫於數百里時正寒雪諸綱紀皆難之侃獨曰資於事父以事君小君猶母也安有父母之疾而不盡心乎乃請行

晉書陶侃傳

郗鑿字道微高平金鄉人漢御史大夫慮之元孫也明帝初卽位王敦專制內外危逼謀仗鑿爲外援由是拜安西將軍兖州刺史都督揚州江西諸軍假節鎮合肥敦忌之表爲尙書令徵還薨年七十一贈太宰諡曰文

成

晉書

陶瞻字道眞歷廣陵相廬江建昌二郡太守遷散騎常

續修廬州府志

卷二十六

名宦傳一

十

侍都亭侯爲蘇峻所害追贈大鴻臚諡曰愍悼

晉書陶侃傳

毛寶字碩眞滎陽武人也爲溫嶠平南叅軍蘇峻作逆爲嶠前鋒俱次茄子浦時蘇峻送米萬斛饋祖約寶悉獲其米約用大饑嶠嘉其勲上爲廬江太守進攻祖約軍次東關破合肥尋召歸石頭陶侃使寶守南城鄧嶽守西城賊遣韓晃攻之寶登城射殺數十人晃問寶曰君是毛廬江耶寶曰是晃曰君名壯勇何不出鬪寶曰君若健將何不入鬪晃笑而退賊平封州陵縣開國侯食邑千六百戶後以輔國將軍豫州刺史北渡守邾城城陷軍潰赴江溺死

晉書

桓伊字叔夏譙人有武幹標悟簡率頗叅諸府軍事累

遷大司馬叅軍時苻堅強盛邊鄙多虞朝議選能拒捍疆場者乃授伊淮南太守以綏御有方進督豫州之二郡揚州之江西五郡軍事建威將軍歷陽太守淮南如故與謝元共破賊及苻堅南寇伊與冠軍將軍謝元破堅于肥水以功封永修縣侯進號右軍將軍卒贈右將軍加散騎常侍諡曰烈

晉書桓宣傳

宋

劉粹字道沖沛郡蕭人也少有志幹初爲州從事遷左衛將軍永初元年以佐命功改封建安縣侯食邑千戶二年督江北淮南郡事征虜將軍廣陵太守三年以本號督豫司雍并四州南豫州之梁郡弋陽馬頭三郡諸

續修廬州府志

卷二十六

名宦傳一

十一

軍事豫州刺史領梁郡太守鎮壽陽治有政績卒時年五十三追贈安北將軍持節本官如故

宋書

諸葛闡淮南太守元嘉二十八年上疏請與在內百官同減俸祿蓋時因軍興詔減官俸三分之一也於是州及郡縣丞尉並悉同減

康熙志

劉劭字伯猷彭城人少有志節兼好文義豫州刺史殷琰叛假輔國將軍率眾討之劭內攻外禦戰無不捷善撫御將帥以寬厚爲眾所依將軍王廣之求劭所乘馬諸將帥並忿廣之叨冒勸劭以法裁之劭歡笑卽時解馬與廣之及殷請降劭約令三軍不得妄動城內士民秋毫無所失百姓感悅咸曰來蘇生爲立碑太始三年

除勳右衛將軍持節都督豫司二州諸軍事征虜將軍  
豫州刺史餘如故元徽初桂陽王休範爲亂勳率所領  
於柘南戰敗死之年五十七謚曰忠昭

宋書

齊

劉善明平原人太祖踐阼以善明勲臣欲與善明祿召  
謂之曰淮南近畿國之形勢自非親賢不使居之卿爲  
我卧治也代高宗爲征虜將軍淮南宣城二郡太守拜  
新塗伯善明至郡上表陳事凡十一條建元二年卒詔  
贈左將軍豫州刺史謚烈伯善明家無遺儲唯有書八  
千卷太祖聞其清貧賜滌家葛塘屯穀五百斛

南齊書

續修廬州府志

卷三十六

名宦傳一

十三

武帝手詔褒賞

康熙志

梁

韋叡字懷文京兆杜陵人也宋永元初袁顛爲雍州刺  
史見而異之引爲主簿高祖卽位遷廷尉封梁都子邑  
三百戶遷太子右衛率出爲輔國將軍豫州刺史領歷  
陽太守四年王師北伐詔叡都督眾軍叡遣長史王超  
宗梁郡太守馮道根攻魏小峴城未能拔叡巡行圍柵  
魏城中忽出數百人陳于門外叡欲擊之諸將皆曰向  
本輕來未有戰備徐還授甲乃可進耳叡曰不然魏城  
中二千人閉門堅守足以自保無故出人于外必其驍  
勇者也若能挫之其城自拔眾猶遲疑叡指其節曰朝

廷授此非以爲飾韋叡之法不可犯也乃進兵士皆殊死戰魏軍果敗因急攻之中宿而城拔遂進討合肥先是右軍司馬胡略等至合肥久未能下叡按行山川曰吾聞汾水可以灌平陽絳水可以灌安邑卽此是也乃堰肥水親自夜率頃之堰城水通舟艦繼至魏初分築東西小城夾合肥叡先攻二城既而魏援將楊靈允帥軍五萬奄至眾懼不敵請表益兵叡笑曰賊已至城下方復求軍臨難鑄兵豈及馬腹且吾求濟師彼亦徵眾猶如吳益巴邛蜀增白帝耳師克在和不在眾古之義也因與戰破之軍人少安初肥水堰立使軍主王懷靜築城于岸守之魏攻陷懷靜城千餘人皆沒魏人乘勝

至叡隄下其勢甚盛軍監潘靈祐勸叡退還巢湖諸將又請走保三義叡怒曰甯有此耶將軍死綏有前無卻因令取織扇麾幢樹之隄下示無動志叡素羸每戰未嘗騎馬以板輿自載督厲眾軍魏兵來鑿隄叡親與爭之魏軍少卻因築壘於隄以自固叡起鬪艦高與合肥城等四面臨之魏人計窮相與悲哭叡攻具既成堰水又滿魏救兵無所用魏守壯杜元倫登城督戰中弩死城遂潰俘獲萬餘級牛馬萬數絹滿十間屋悉充軍賞叡每晝接客旅夜算軍書三更起張燈達曙撫循其眾常如不及故投募之士爭歸之所至頓舍修立館宇藩籬牆壁皆應準繩合肥既平高祖詔眾軍進次東陵去

魏襄城二十里將會戰有詔班師去賊既近懼爲所躡  
叡悉遣輜重居前身乘小輿殿後魏人服叡威名望之  
不敢逼至軍而還至是遷豫州于合肥普通元年夏遷  
侍中車騎將軍八月卒於家贈侍中車騎將軍開府議  
同三司諡曰嚴

梁書

馮道根字巨基廣平鄆人也以孝聞於鄉里高祖起義  
率鄉人子弟勝兵者悉歸高祖天監二年爲甯朔將軍  
南梁太守韋叡圍合肥克之道根與諸軍同進所在有  
功八年遷貞毅將軍假節督豫州諸軍事豫州刺史領  
汝陰太守爲政清簡境內安定十六年復假節都督豫  
州諸軍事信武將軍豫州刺史豫部重得道根人皆喜

續修廬州府志

卷二十六

名宦傳一

古

悅高祖每稱曰馮道根所在能使朝廷不復憶有一州  
居州少時遇疾徵爲散騎常侍左軍將軍既至疾甚普  
通元年卒贈信武將軍左衛將軍諡曰威

梁書

馬仙琕字靈馥扶風郿人也少以果敢聞起家郢州主  
簿遷武騎常侍永元中以勲至前將軍出爲龍驤將軍  
南汝陰譙二郡太守天監四年王師北討以功封滄淮  
縣伯邑四百戶十一年遷持節督豫北豫霍三州諸軍  
事信武將軍豫州刺史領南汝陰太守餘如故琕爲將  
能與士卒同勞逸身衣不過布帛所居無帷幕衾屏行  
則飲食與厮養最下者同其在邊境常單身潛入敵庭  
伺知壁壘村落險要處所故戰多克捷士卒亦甘心爲

之用高祖雅愛之在州四年卒贈左衛將軍諡曰剛

梁書

裴邃字淵明河東聞喜人魏襄州刺史綽之後也寓居壽陽十歲能屬文齊建武初刺史蕭遙昌引爲府主簿裴叔業以壽陽降魏豫州豪族皆被驅掠邃遂隨眾北徙天監初自拔還朝求邊境自効以爲輔國將軍廬州太守時魏將呂頗率眾五萬奄來攻郡邃率麾下拒破之加右軍將軍五年平小峴攻合肥以功封夷陵縣子邑三百戶普通二年持節督北徐州諸軍事信武將軍北徐州刺史鎮合肥四年進號宣毅將軍卒贈侍中左衛將軍諡曰烈邃爲政寬明能得士心居身方正有威重將吏憚之少敢犯法及其卒也淮肥間莫不流涕

梁書

續修廬州府志

卷二十六

名宦傳一

五

夏候亶字世龍車騎將軍詳長子也普通六年大舉北伐先遣豫州刺史裴邃帥驍將自南道伐壽陽城未克而邃卒乃加亶使持節馳驛代邃與魏將河間王元琛臨淮王元彧等相拒頻戰克捷尋有密敕班師合肥以休士馬須堰成復進七年夏淮堰水盛壽陽城將沒亶帥湛僧智魚宏張澄等通清流澗將入淮肥魏軍夾肥築城出亶軍後亶與僧智還襲破之所向皆降詔以壽陽依前代置豫州合肥鎮改爲南豫州以亶爲使持節都督豫州緣淮南豫霍義定五州諸軍事雲麾將軍豫南豫二州刺史三年卒於州鎮贈車騎將軍諡曰襄州民夏侯簡等五百人表請爲亶立碑置祠詔許之

梁書

夏侯夔字季龍直弟也起家授使持節督南豫州諸軍事豫州刺史豫州積歲寇戎人頗失業夔乃帥軍人於倉陵立堰溉田千餘頃歲收穀百餘萬石以充儲備兼贍貧人境內賴之夔兄直先經此任至是夔又居焉兄弟並有恩惠於鄉里百姓歌之曰我之有州頻仍夏侯前兄後弟布政優優卒於州年五十六追贈侍中安北將軍諡曰桓子謨嗣

梁書

蕭範字世儀莅民甚得時譽撫循將士盡獲歡心大清

元年以範為合州刺史鎮合肥

梁書鄱陽王恢傳

陳

荀朗字深明潁陰人侯景之亂朗招率徒旅據巢湖間

續修廬州府志

卷二十六

名宦傳一

夫

無所屬梁簡文帝密授朗雲麾將軍豫州刺史與外藩

討景景敗於巴陵朗出自濡須截景破其後軍世祖即

位遷使持節安北將軍散騎常侍都督霍晉合三州諸

軍事合州刺史卒贈南豫州刺史

陳書

裴景暉合州刺史以平賊功封都亭侯

明隆慶志

黃法氤字仲昭巴山新建人也少勁捷有膽力步行日

三百里距躍三丈頗便書疏閑明簿領出入郡中為鄉

閭所憚太建四年為使持節散騎常侍都督南豫州諸

軍事征南大將軍南豫州刺史五年大舉北伐都督吳

明徹出秦郡以法氤為都督出歷陽齊遣歷陽王步騎

五萬來援於小岷築城法氤遣左衛將軍樊毅分兵於



大峴禦之大破齊軍盡獲人馬器械於是乃爲拍車及步艦豎拍以逼厯陽人窘蹴乞降法甌綏之則又堅守法甌怒親率士卒攻城施拍加其樓堞時又大雨城崩克之盡誅戍卒進兵合肥望旗降欵法甌不令軍士侵掠躬自撫勞而與之盟並放還北以功加侍中改封義陽郡公邑二千戶其年遷都督合霍二州諸軍事征西大將軍合州刺史增邑五百戶七年徙都督豫建光朔合北徐六州諸軍事豫州刺史鎮壽陽侍中散騎常侍持節將軍儀同鼓吹秩並如故八年十月薨時年五十九贈侍中中權大將軍司空諡曰威

陳書

魯廣達吳州刺史悉達之弟也隨吳明徹討周迪於臨

續修廬州府志

卷二十六

名宦傳一

七

川每戰功居最太建元年都督南豫州諸軍事南豫州刺史十年授使持節都督合霍二州諸軍事進號仁威將軍合州刺史

陳書

隋

韓擒虎字子通河南東垣人也開皇初高祖以擒虎有文武才夙著威名拜廬州總管委以平陳之任甚爲敵人所憚及大舉伐陳以擒虎爲先鋒擒虎率五百人襲采石守者皆醉遂取之進攻姑孰半日而拔次於新林江南父老素聞其威信來謁軍門晝夜不絕

隋書

唐

韋宗立授檢校倉部員外郎知鹽鐵廬壽院事其制云

敕權知鹽鐵廬壽院事朝請郎侍御史內供奉韋宗立等近者恢復河湟訓定羌虜江湖之間人安而不擾供饋之費財有餘而力不蹙實由管權委之名臣今者尙書休以爾宗立等上言咸曰清白處已勤慎奉公予安能知無不可者暨頡與潛皆稱名士自有丞相爲爾已知守職佐藩無忝新命可依前件

欽定全唐文

宋

楊允恭漢州緜竹人至道初爲發運使巢廬江二縣舊隸廬江道遠多寇民輸勞費允恭請以二縣建軍詔許之以無爲爲額淮南十八州軍其九禁鹽地則上下其直民利商鹽之賤故販者益眾至有持兵器往來爲盜

續修廬州府志

卷二十六

名宦傳一

六

者允恭以爲行法宜一卽奏請悉禁而官遣吏主之事下三司三司言其不可允恭再三爲請太宗始從之是歲收利巨萬咸平初爲荆湖江浙都巡檢使卒于昇州年五十六

宋史

李光字泰發上虞人紹興元年除端明殿學士江東安撫大使知建康府壽春滁濠廬和無爲宣撫使時太平州卒陸德據城叛光多設方畧盡擒其黨

宋史

楊存中本名沂中字正甫紹興間賜名存中代州崞縣人魁梧沈鷺少警敏誦書數百言力能絕人慨然語人曰大丈夫當於武功取富貴焉用俯首爲腐儒哉於是學孫吳法善射騎宣和末山東河北羣盜四起存中應

募擊賊積功至忠翊郎遷閣門祇候建炎二年遷榮州  
刺史問宗南渡以奇功遷文州防禦使御前中軍統制  
紹興元年遷宣州觀察使二年春進神武中軍統制韓  
世忠圍淮陽從張浚乞張俊將趙密爲助俊令存中助  
之請於朝故有是命於是存中以入隊萬人趨督府助  
世忠十月存中與劉猷戰於藕塘大破之猷之初入也  
淮西宣撫使劉光世欲棄廬州退保太平賊眾十萬已  
次濠壽間浚命張俊拒之使存中往泗州與俊合及至  
泗則光世已舍廬去浚遣人諭之曰一人渡江卽斬以  
徇光世不得已還廬駐兵與存中相應賊先犯定遠縣  
存中以兵二千襲敗於越家坊旣而與猷兵遇藕塘賊

據山列陣矢下如雨存中急擊之且使統制吳錫以勁  
騎五千突其陣陣亂存中鼓大兵乘之自以勁騎衝其  
脅大呼曰破賊矣賊錯愕駭視前軍統制張宗顏自泗  
來乘背擊之賊大敗猷以首抵謀主李愕曰適見髯將  
軍銳不可當果楊殿前也卽以數騎遁去餘黨萬人僵  
立失措存中躍馬叱之皆怖而降捷聞帝遣中使勞賜  
謂宰執曰卿輩始知朕得人也除保成軍節度使殿前  
都虞侯尋兼領馬步帥九年遷殿前副都指揮使十年  
金人叛盟取河南命存中爲淮北宣撫副使十一年兀  
朮恥順昌之敗復謀來侵詔大合兵於淮西以待之於  
是存中以殿司兵二萬戍淮與金人戰於柘皋敗之二

十年封蔡國公二十八年拜少師卒年六十五以太師致仕追封和王謚武恭宋史

劉錡字信叔順德軍人瀘州軍節度使仲武第九子也美儀狀善射聲如洪鐘高宗卽位錄仲武後錡得召見奇之特授闔門宣贊舍人差知岷州爲隴右都護與夏人戰屢勝夏人兒啼轍怖之曰劉都護來會使者白蜀歸以錡名聞召除江東路副總管扈從赴金陵七年帥合肥十年金人攻廬和二州錡抵廬州與張俊楊沂中會而敵已大入錡據東關之險以遏其衝引兵出清溪兩戰皆勝行至柘皋與金人夾石梁河而陣河通巢湖廣二丈錡命曳薪疊橋須臾而成遣甲士數隊沿橋卧

續修廬州府志

卷二十六

名宦傳一

三

槍而坐會沂中王德田師中張子蓋軍俱至翌日兀朮以鐵騎十萬分爲兩隅夾道而陣德薄其右隅引弓射一酋斃之因大呼馳擊諸軍鼓譟金人以拐子馬兩翼而進德率眾鏖戰沂中以萬兵各持長斧奮擊之敵大敗錡與德等追之又敗於東山敵望見曰此順昌旗幟也卽退走宋史

張宗顏字希賢延安人紹興八年知廬州總帥事敵數百騎抵城下宗顏以騎百餘禦之敵退有至自淮北者傳金人言曰此張鐵山弟也紹興九年加贈保靜軍節度使謚壯敏宋史

仇愈字泰安益都人大觀三年進士以淮西宣撫知廬

州劉豫子麟合金兵大入民情洶懼宣撫司統制張琦者冀乘危爲亂驅居民越江南走欲先脅愈出擁甲士數千人突入露刃登樓揚白麾左右驚潰迫愈上馬愈徐謂曰若輩無守土責吾當以死殉國堅不爲動神色無少異琦等錯愕遽散其徒人心遂定遣其子自開道赴朝廷告急雖旌其子以官而援卒不至帝方下詔親征而詔亦不至淮甸喧言將棄兩淮爲保江計愈錄詔語揭之郡縣讀者至流涕感思自奮監押閹僅死于賊餘眾來歸州帑匱竭無以爲賞愈悉引班坐犒以酒食慰勞之眾皆感勵募廬壽兵得數百益鄉兵二千出奇直抵壽春城下敵三戰皆北卻走渡淮其後麟復以步

騎數千至合肥人心怖駭不知所爲會京西制置使遣牛皋統兵適至愈以忠義感之皋素勇甚以二千餘騎馳出短兵相接所向披靡敵遂自潰初宣撫司旣不以一卒援諸郡但令焚積聚棄城退保文移不絕於道又請俊行之浚檄愈度其宜處之愈謂殘破之餘兵食不給誠不能支敵然帥臣任一路之責誓當死守今若委城使金人有淮西治兵艦於巢湖必貽朝廷憂力陳不可浚聽其言卒全活數州之眾尋詔詣闕軍民號送之官至左朝議大夫爵益都縣伯卒贈左通議大夫

宋史

趙璠老乾道癸巳官尚書郎會兩淮分帥上命行淮西事至郡謁文廟卽倡儀修復於時苦詘乃齊量出入持

以堅忍久之費有所出至淳熙元年營構一新祀馬忠肅包孝肅二公於翼室揭示勉學厥功懋焉

康熙志

郭振字仲舉涇縣人乾道五年以奉國軍承宣使建撫諸軍都統制兼帥淮西淳熙間展合肥城居民便之贈

少保

明隆慶志

延璽淳熙八年淮西安撫使在郡逾年民和政成修表節臺祀包孝肅公又以孝肅與忠肅皆常典鄉郡乃繪其像於學冀以興起廬俗

康熙志

邛密字宗卿江陰軍人隆興元年進士宣撫江淮金人擁眾自渦口犯淮南或勸密棄廬和州爲守江記密曰棄淮則與敵共長江之險矣吾當與淮南俱存亡益增

續修廬州府志

卷二十六

名宦傳一

三

兵爲防尋改江淮制置大使招輯邊民二萬號雄淮軍淮西賴其力拜同知樞密院事卒諡忠定

宋史

杜杲字子昕邵武人淮西制置使曾式中辟廬州節度推官浮光兵變杲單騎往誅其渠魁守將爭餉金悉反

之知六安定遠再知濠州改安豐元兵圍城杲大戰明年復至又大戰擢匠作監御書慰諭之詔以安撫兼廬

州進大府卿淮西制置副使兼轉運使擢文華閣學士沿江制置使知建康府行宮留守節置安慶和無爲三郡進敷文閣學士刑部尙書兼吏部尙書進徽猷閣奉祀升寶文閣致仕卒贈閣府杲淹貫多能晚歲專意理學嘗言吾兵間無悖謀左畫得於四書

宋史

吳淵字道父秘閣修撰柔勝第三子也嘉定七年舉進士調建德縣主簿以功進端明殿學士沿江制置使江東安撫使兼知建康府兼行宮留守節制和州無爲軍安慶府兼三郡屯田使團丁壯置軍分立隊伍星聯某布脉絡貫通無事則耕有驚則禦詔以淵興利除害所列二十五事究心軍民拜資政殿大學士職任如舊與執政封金陵侯進爵爲公寶佑五年正月朔以功拜參知政事卒贈少保

宋史

王埜字子文寶章閣待制介之子也以父蔭補官登嘉定十二年進士第淳祐末遷沿江制置使江東安撫使節制和州無爲軍安慶府兼三郡屯田行宮留守巡江

續修廬州府志

卷二十六

名宦傳一

三

引水軍大閱舳艫相銜幾三十里憑高望遠考求山川險阨謂要務莫如屯田講行事宜修飾行宮諸殿室推京口法創游擊軍萬二千蒙衝萬艘江上晏然寶祐二年拜端明殿學士簽書樞密院事封吳郡侯

宋史

馬光祖字華父婺州金華人寶慶二年進士沿江制置使江東安撫使知建康府兼行宮留守兼節制和州無爲軍安慶府三郡屯田使始至官卽以常例公用器皿錢二十萬緡支犒軍民減租稅養鰥寡孤疾無告之人招兵置砦給錢助諸軍婚嫁屬縣稅折收絲綿絹帛倚閣除免以數萬計興學校禮賢才辟召僚屬皆極一時之選去民思之不已

宋史

元

羅璧字仲玉鎮江人昭毅大將軍同知淮西道宣慰使  
事請兩淮荒閒之田給貧民耕墾三年而後量收其入  
從之歲得粟數十萬斛陞鎮國上將軍北海南道宣慰  
使都元帥元史

姚天福字君祥絳州人淮西道按察使淮甸當兵衝將  
吏豪滑為民害者悉剷除之兵民大悅元史

昂吉兒張掖人姓野蒲氏領其父軍從征諸國有功入  
廬州民安堵無所犯時兩淮兵革之餘荆榛蔽野昂吉  
兒請立屯田以給軍餉帝從之元史

陳思謙字景讓警敏好學尤精於皇極經世書文宗天  
續修廬州府志 卷二十六 名宦傳一 十四

歷初政收攬賢能授典寶監經歷十一年改淮西廉訪  
使廬州盜起思謙言於宣讓王帖木兒不花曰承平日  
久民不知兵王以帝室之胄鎮撫淮甸豈得坐視思謙  
願與王戮力殄滅王曰此吾責也但鞍馬器械未備何  
能禦敵思謙括官民馬置兵甲不日而集分道並進遂  
擒渠賊廬州平元史

馬世德字元臣也里可溫國人等進士至正十三年官  
淮西廉訪僉事合肥城圯為木柵以拒賊世德請皇孫  
宣讓王帖木兒不花即日發公私錢十萬貫重築之民  
賴無恐先是世德以庸田僉事城姑蘇詳余忠宣公記



明

史可法字憲之大興籍祥符人世錦衣百戶崇禎元年進士安廬道初設朝議以可法有文武才超擢兵備道丙子賊從蘄黃犯潛太可法親冒矢石督兵勦禦殺賊數百人賊遁後輕騎往來舒六之間楚餅糲飯與士卒共之辛丑以功晉巡撫僉都御史駐六安賊至三戰三捷軍聲大振地方旱蝗百計賑卹淮南倚以為二天旋以憂去壬午起總漕再至廬州為文祭官紳士民之死難者士眾感激郡得暫安

康熙志

湯開遠字伯開江西人崇禎五年舉人按察僉事監安廬二郡軍是時賊大擾江北開遠數有功巡撫史可法

續修廬州府志

卷二十六

名宦傳一

五

薦其治行卓異進秩副使監軍如故竟以勞瘁卒於官軍民咸為泣下贈太僕少卿

明史

國朝

丁允元山東進士順治二年以蘇州知府陞兵備道端方廉靜政尚寬平亂後郡中士子散處四方到任首崇學校人文漸起迄今猶追慕之

康熙志

趙振業山東人由進士任安廬叅議練達有才智時土寇張福寰侯應龍等據霍山率兵禦之兩易寒暑始平

卽解綬歸里

康熙志

崔允宏字與我北直進士由兩淮巡鹽御史轉廬六叅議愛養士民創書院於黌宮左顏曰嶽麓巨觀

康熙志

孫籀字頡初浙江進士由刑部郎督山右學政遷廬六  
叅議政修事明每決一獄卽書審語於壁以示公葺鎮  
淮樓於兵火之餘爲一郡巨觀甫竣奉裁去康熙志  
周天爵字敬修山東東阿人嘉慶辛未進士以本班就  
銓是時年已踰五十道光四年選安徽懷遠知縣勸民  
捐設豐義倉修築郭陂塘龍王壩諸工溉農田千餘畝  
八年調阜陽政聲大著有劾其殘酷者

特命總督蔣攸銛查奏尋覆奏言天爵賢有愛民如子嫉惡如  
仇之語

詔曰此等不避嫌怨之員最爲難得既據查明刑傷各犯皆凶  
惡棍徒著毋庸議由是洊升宿州知州廬州府知府廬

續修廬州府志

卷二十六

名宦傳一

美

鳳道屢獲巨盜教匪治如律任廬陽時躬赴朱家巷白  
龍場等處緝匪一出而安靖數月以撮城爲鹽私總滙  
尤嚴緝捕嘗隨藩司勘災無爲力主救生船餅饒蘆蓆  
二三事以濟急拯救飢溺不殫苦口任安徽按察使甫一  
年升陝西布政使歷漕運總督補湖廣總督被劾罷以  
粵賊熾復起用

命署廣西巡撫以病歸咸豐三年

賞兵部侍郎銜協辦安徽防剿事務天爵於壽州募勇張鳳山  
等千二百餘人帶防正陽關旋授巡撫天爵時在宿州  
既授事以廬州地居皖省之中形勢扼要疏請遷省治  
於廬州府改安慶省爲府城又言兵機吏治難兼願尋

改授學政李嘉端爲巡撫天爵仍以兵部侍郎銜辦理防剿遂飭兵勇分捕宿亳懷遠蒙城靈璧等州縣擒匪斬牛文禮等五百餘人北路肅清親督義勇往廬鳳追剿南路餘匪剿平定遠匪目陸遐齡賊巢四戰斬千餘級尋攻永城之火燒店獲擒匪首胡萬箱等又於張橋鎮雉河集等處先後斬獲著名賊目九月卒於軍奉

諭追贈尙書銜照尙書例

賜卹加

恩賜諡文忠無庸俟內閣擬請以示篤念耆臣逾格哀忠至意

史館  
鈔傳謹考

國朝非翰林不得諡文天爵由

續修廬州府志

卷二十六

名宦傳一

七

特賜異數也

嚴正基  
憫忠草

天爵出身科第而武技絕倫捕治盜賊懲

戢豪強人咸畏懾篤信良知之學治法一宗陽明在懷遠擒倪濤在阜陽擒李大奮致在宿州興書院建考棚修橋梁在廬州治江壩振學校剿匪潁州卒於王市集百姓哭送數十里至今尸祝之中間罷官歸田躬耕自給親與其子磨菽云

懷遠阜陽合肥等縣志宿  
州志通志周文忠尺牘

袁甲三字午橋河南項城進士由主事洊擢給事中咸豐三年幫同呂賢基辦理安徽團練尋署廬鳳潁道代領周天爵之眾破巨捻於高公廟加三品卿銜署安徽布政使疏辭布政使卽以三品卿兵科給事中剿辦安徽擒匪擒擒首鄧大俊孫重倫宮步雲馬九等十二月

廬州陷四年擣蒙城賊走永城追及於蕭縣賊全股渡河甲三引軍還

旨嚴飭之會賊由黃河南竄敗之於潁州於正陽關回軍亳蒙擣臨湖鋪偏雉河破義門移軍駐臨淮遏賊北竄超擢左副都御史六安團練復州城甲三請

恩免糧賦優叙助剿者分兵攻俞家灣擒其渠援六安軍蒙城敗蘇添幅等於寺覺集敗烏江踞逆於馬河遣參將劉玉豹舉人臧紆青由六安奪大小兩關圍桐城援賊麇至紆青戰死玉豹收眾退保六安

旨嚴飭之五年緣事罷職尋辨獲雪

命隨英桂剿辦河南捻匪時張落刑等分踞鳳潁徐州各境圍

續修廬州府志

卷二十六

名宦傳一

五

亳陷懷遠蒙城夏邑虞城犯歸德會甲三之子編修保恆以三千人解亳圍甲三自永城亳州急抵雉河賊巢督陣摧堅累戰皆捷落刑僅身免

旨嘉獎著以三品京堂候補敗張落刑於大橋口於太清宮於十八里鋪七年拔王鄧姚諸圩授太僕寺卿移師助勝保攻張落刑於正陽關分兵克韓圩十月偕勝保援固始八年二月解其圍進復六安宿南賊踞王家圩甲三自正陽移軍宿州襲殲賊首乘勝攻七圩

命代勝保督辦三省剿匪事宜擊張落刑於陳家莊走之派兵復豐縣連敗之於銅山一帶尋蒙亳賊竄歸德將窺周家口佯趨西北開封震動甲三令保恆傅振邦分道追

及大破之豫境肅清九年正月派兵擊張落刑於草溝破其巢追至沱河溺賊無算

命來京供職旋以三品頂戴署漕運總督十月勝保丁憂

命署欽差大臣關防督辦皖省軍務尋實授漕運總督

欽差大臣克臨淮關進擣鳳陽鳳陽府縣兩城相距三里十年正月並克之派兵克清江浦復全椒縣督軍圍攻定遠擊退援賊陳玉城鳳境以清十一年遣兵破泗州靈璧之賊九月疏請派兵討苗沛霖

諭甲三督同李世忠調派官軍會同賈臻田在田嚴樹森毛昶熙等各路兵勇奮力追剿甲三遂檄世忠等攻壽州未至而壽州已陷甲三攻懷遠適張落刑將由長淮衛渡續修廬州府志

卷二十六

名宦傳一

无

淮而北遂移軍擊走之駐軍長淮衛解散苗黨反正二百餘圩十一月克定遠十二月拔六合天長同治元年正月克江浦浦口四月遣將帶兵會將軍多隆阿克廬州府七月以病開缺回籍又疏稱苗練終難就撫二年三月果復叛

命甲三在籍會籌防剿時病已亟猶日議戰事六月卒

賜卹如例

予諡端敏陳州臨淮淮安並建專祠入祀河南南鄉賢淮安名宦

祠史館鈔傳

江忠源字岷樵湖南新甯人道光丁酉舉人甲辰大挑得教職歸丁未秋猺民雷再浩勾廣西賊爲亂忠源率

鄉兵搗巢擒再浩大吏上其功得

旨以知縣用署浙江秀水知縣邑被水災忠源勸分設賑收棄  
孩計擒劇盜十數人巡撫吳文鎔待以國士補麗水知  
縣會

文宗顯皇帝登極

詔各大臣保舉人才侍郎曾國藩具疏薦之有

旨召見浙撫疏畱辦海塘工閱四月工訖以父憂歸時廣西賊  
熾賽尙阿出視師聞忠源知兵疏調赴粵爲副都統烏  
蘭泰所賓敬深相倚重敘勞請擢同知直隸州募故所  
用鄉兵五百人使弟忠濬帥以來號楚勇時賊氛惡甚  
官兵數萬莫敢撓忠源築壘逼賊營賊以其少且新集

續修廬州府志

卷二十六

名宦傳一

三

易與也急犯之方堅壁如不敢戰賊近塹始開壁馳之  
斬首數百時賊萃永安官軍環之闕城北一面請掘長  
壕聚殲之弗聽明年春以疾歸賊果由北路出犯桂林  
忠源在籍聞之力疾起出私財增募千人倍道赴援至  
則烏公中礮卒城圍逾月忠源進扼東岸之鷓鴣洲三  
戰皆捷四月朔桂林圍解擢知府賊趨全州閔道敗之  
全州陷賊趨湖南忠源先諸軍扼富塘埔賊悉載輜重  
舟中期水陸並下忠源伐樹塞河截賊蓑衣渡鏖戰兩  
晝夜逆舟挂樹不得前僞渠馮雲山中礮死獲其輜重  
賊不得掠舟而北遂東竄道州初忠源慮東岸空虛白  
當事請分軍扼截弗許及賊踞道州眾猶不滿萬忠源

慮日久裹脅眾乃建議分防不如合剿遠堵不如近攻  
七月賊自藍田嘉禾犯桂陽旋陷郴州忠源統楚勇至  
郴州約總兵和春由石子嶺潛師出賊前未至賊竄永  
興以萬眾留郴相牽制忠源倍道由衡州援省會賊已  
踞城南及小西門窟穴於民廛攻甚急南城外天心閣  
地勢高賊方棚其上忠源望見驚曰賊據此長沙危矣  
急帥所部爭之死傷二十人督戰益力賊退亟移築堅  
壘去賊數十武自是長沙止南門受敵賊巢背水面城  
當絕地賊渠蕭朝貴中礮死賊數穿地道又先後爲副  
將鄧紹良瞿騰龍所拒氣少沮逾旬洪楊大股至忠源  
弟忠濟自郴尾之約夾擊方大戰賊伏叢冢間挺矛刺

忠源傷腓墜馬遇救免新撫張亮基就詢方略告以官  
軍四面集惟河西一路虛請調重兵駐龍回塘扼賊竄  
路亮基趨之而河西諸將逡巡莫敢前賊卒由龍回塘  
竄出掠舟西遁蔽江直下十一月忠源追賊至臨資口  
屬巴陵土寇晏仲武起檄留剿事平又剿平瀏陽會匪  
周國虞時以援湖南功擢道員三年正月張亮基權湖  
廣總督疏調之旋授湖北按察使剿平通城劉立簡崇  
陽陳北斗嘉魚熊開宇等奉

旨幫辦江南軍務忠源拜疏言軍務得失八條請嚴軍法撤提

督汰弁兵明賞罰戒浪戰察地勢嚴約束寬脅從凡五  
千餘言得

旨所陳均切中機宜又疏請四川湖南北三省分造戰船習水師令廣東籌款鑄礮疏入蒙

嘉納四月率軍東下廣濟賊宋關祐等抗糧戕守令聚眾數萬進剿平之五月行抵九江賊自皖江沂流上距城四十里憚忠源改由彭蠡犯南昌時忠源方奉

命援鳳穎以江西完善禍急事難卽抗疏改道援江西軍士方患暑疫汰之得千三百人以五月十六日抵南昌三晝夜行五百里章江門最受敵忠源自當之宿譙樓執城外民舍十八日賊舟蔽江至薄城礮擊之稍卻營兵四人將縋城走立斬以徇曉夜躬行賊穴地轟城鑿隧道迎之三次藥發陷城八百餘丈忠源及弟忠濟力拒之續修廬州府志

卷二十六

名宦傳一

三

賊不能入

上頒賜玉翎管及決拾各二時湖南援師先後集賊圖竄吉安臨江而安福泰和萬安寇復起乃分軍樟樹鎮扼賊衝檄援師訓導羅澤南等剿泰和各屬巡撫以下皆持不可忠源曰南昌兵逾萬畱三千人不見多若泰和賊與南昌賊鉤連上下路絕此危道也已獲賊諜得其往來書果約急攻吉安而已爲援師所敗戰守九十餘日圍解捷聞

天子嘉其功晉二品服師及德安聞賊上犯急以二千人渡江助守田家鎮令後至之兵間道趨武昌司防者用戰艦扼江而南岸半壁山不設備忠源至急揮兵據險賊已



至南岸同知勞光泰又以礮船遁師遂潰道員徐豐玉張汝瀛死之黃州漢陽皆陷惟武昌以先遣援得全遂以失利上疏自劾

詔鑄四級旋授安徽巡撫忠源疏請增兵萬人當一路又念行省新改廬州爲南北樞紐危在旦夕去稍遲賊且北竄遂以二千人先發冒雨抵六安將卒多病忠源亦病適舒桐告陷六安吏民遮道留忠源不可留千人守六安昇病入廬城繕守備部分未定警報日夕至知府胡元燁先嘗具言城中軍實裕團丁可萬餘速巡撫往及至而守具糗糧一無所恃默審元燁有異志擬誅之越二日賊大至忠源力疾登陴嚴守分門布置賊仍用地雷續修廬州府志

卷二十六

名宦傳一

三

轟大西門月城繼轟文昌門忠源親督楚勇殲賊數百疏城中守禦狀

上特賞霍隆武巴圖魯名號賊圍日久城無見糧援軍屯四十里外不得進忠源忍病堅守逾月賊奪氣將遁有以城中食乏軍火且盡告者遂增開隧道十二月十七日昧爽水西門城塌十餘丈忠源督兵且戰且修築賊自南門緣梯入忠源轉戰至水關橋之古塘被七創奮投橋下死之卒年四十有二同殉者同知鄒漢勛參將馬良勲自六安從入城者也參將戴文瀾縣丞艾延輝自湖北來援乘間入者也布政使劉裕鈺池州知府陳源交同知胡子猷副將松安縣丞興福以下官屬數十人皆

死而胡元焯竟降賊前以城中虛實告及置梯南門皆其勇目徐淮所爲城陷後八日舊卒周昌發冒死入城負尸出面如生事聞

上震悼追贈總督卽照總督陣亡例

賜卹入祀昭忠祠於殉難地方建立專祠

賜祭葬諡忠烈世襲騎都尉兼一雲騎尉

命廬州及湖南江西各建專祠又請祀安慶省城忠義祠

江忠烈事

狀通志

附鄒漢勛字叔績湖南新化人母吳佐父編地理釋遂能周知天下沿革漢勛秉母教通輿圖形勢之學中咸

豐辛亥恩科舉人江忠源之守南昌也漢勛之弟漢

續修廬州府志

卷二十六

名宦傳一

一

章實從漢勛與江忠淑率勇千人赴援助守戰有功圍解授知縣旋從巡撫江忠源軍自武昌至六安忠源方臥病命漢勛募勇得二千人謀於城外據險扼賊傳城之路而元焯陰通賊以兵餉兩裕迎巡撫入廬城入城甫三日而賊大至城周二十六里堞口五千餘守具不設人數不敷忠源令兵民協守漢勛分守大西門賊知城中空虛連營三十里圍之數重漢勛慮勇新集不足恃日諭以忠義同甘苦用激厲之賊從大西門外穴地道數處欲轟城漢勛預掘濠於城下倚甕循聲知外穴所在迎掘之穴穿灌以水斃賊甚眾賊益旁掘以亂其聲迎掘相左火發城崩十餘丈磚石飛空賊蠡擁入漢

勛力堵之重賞購死士築城城復完城兩陷而兩完忠源倚以爲重專奏上功

特旨擢同知直隸州

賞花翎凡堅守三十七日水西門地道復發胡元煒率勇降賊城遂陷漢勛在西門城上憤激甚麾左右速去飲酒斗餘持劍殺賊十數人力盡遇害年四十有九賊裂其尸死甚慘得

賜卹

鄒叔子集  
憫忠草

又有余樅者江西新建人隨巡撫江忠源征剿立功保府經歷縣丞廬州府城陷時陣亡

胡文忠集

李本仁字藹如浙江錢塘人道光丙申恩科進士授

庶吉士散館改兵主事由郎中擢外任授江西吉南贛

續修廬州府志

卷二十六

名宦傳一

三

甯道旋升安徽按察使擢布政使咸豐三年正月粵逆由武昌南下皖城失陷本仁受傷赴水昏迷不省隨勇救負出城嗣被議因省城奏改廬州暫寓候

旨是年十一月江忠源撫皖未到任卽奏調辦理軍需事務本仁製造滾木火礮噴筒等項試用極精大府稱善粵逆撲郡城本仁奉令守西門十二月賊由地道轟入城陷本仁督家丁迎剿力竭遇害經皖撫福濟入告奉

旨不失見危授命之義着照六品官陣亡例議卹世襲雲騎尉

恩騎尉罔替

科鈔

劉裕鈐湖北江夏人進士咸豐三年任安徽布政使時省城僑置廬州裕鈐隨巡撫江忠源布置戰守巡撫疑

胡元煒有異志欲誅之裕鈗不敢任事遂止凡在城佐守三十七日城陷死之

先正事畧合肥縣志

贈卹如例

科鈔

附陳源充字岱雲湖南茶陵州人由編修授江西知府以憂歸服闋揀發安徽補池州府知府咸豐三年冬髮逆犯廬州府十一月十日巡撫江忠源至廬州源充先已奉檄在城遂同守禦迭次縋師出戰旋以餉匱援絕堅守三十餘日城陷死之奉

旨贈卹

憫忠草

李孟羣字鶴人河南固始人父卿毅官湖北按察使省城陷殉難

續修廬州府志

卷二十六

名宦傳一

美

贈布政使

賜諡愍肅有子五人孟羣爲長幼聰穎讀書目數行下下筆千言豐頤廣額以氣節著十八中丙午舉人丁未聯捷進士分發廣西卽用知縣初署靈川縣事有政聲從大軍討平李沅發之亂以功擢同知旋攝桂平縣甫下車值金田逆匪起從軍屢著戰功江忠源在軍嘗左右之巡撫周天爵亦特器重得不爲忌者所中既以桂林解圍援剿潯州艇寇積功至道員攝潯州知府侍郎曾國藩用水師於湘楚間奏調孟羣充水軍將領大捷於岳州從下武昌聞父愍肅公殉難之信甫復城急縋城入收殮父尸擬回籍守制總督楊需奏留軍前師次湖口會

水師舳板入江西湖內爲賊阻截不得出長輪失所恃  
又爲風浪所敗多損失乃退還武昌因水師別擇將領  
改統陸師三千人屯金口數月署湖北按察使咸豐五  
年八月大股賊撲金口陸營失守

諭曰胡林翼與李孟羣素來用兵尙合機宜現雖兵勇潰敗諒  
能重整隊伍不至頓挫軍威欽此旋統礮船六十號入湖停  
泊沙市以總督官文檄從收復漢陽府所釋脅從甚多  
未幾安徽巡撫福濟以兵單乞援於楚大吏檄孟羣赴  
援力戰於羅蘄間者數月既又連拔英霍乃師既出省  
鄂餉停發皖中主兵事者不措餉糧路遂日絀會固始  
被圍甚急勝保書來徵援孟羣以方奉

續修廬州府志

卷二十六

名宦傳一

三

旨授皖藩未敢先私情而後公義雖老母妻子均在圍中義不  
敢卽往待奏奉

俞允而後行師抵固始甫半月卽解圍而六安又失勝保促孟  
羣隨攻六安以無口糧弗克偕行僅遣部將盧又能率  
飢軍應之既復六安勝保又徵孟羣所部往懷遠糧愈  
絀兵不果行巡撫福濟引疾奏以孟羣暫權巡撫事奉  
命未十日而廬州失守

詔鐫職立功自効歸勝營節制勝保遂誣劾孟羣於廬城陷時  
逃往六安既又令駐營長城當賊衝苦守經年不給餉  
所部精銳漸散去新撫翁同書在定遠稍濟一二然不  
足軍用九年二月四日六安復失孟羣營被圍八日請

援不報求餉不許飢軍散者愈多僅存者千三百人耳而賊渠陳玉城以八萬人合圍鏖戰附營團練皆潰孟羣立營門外持矛誓死決戰負重傷被執陳玉城婉言誘之降孟羣席地坐厲聲曰吾身受

朝廷大恩奉

命征剿今以糧盡援絕不幸被獲汝速殺吾勿多言賊懼不敢屈昇之至廬郡館中進食不食題絕命詞四章大罵不屈死之十年春千總沈國泰歸其尸同治元年

賜卹如布政使陣亡例諡武愍

賜祭一壇照巡撫陣亡例優卹於廬州府建專祠并從祀伊父

李卿毅固始專祠世襲騎都尉兼一雲騎尉史館鈔傳李武愍

續修廬州府志 卷二十六 名宦傳一 奕

絕命詞序

附錄絕命詞四章敗局猶爭一著棋髮將種種待奚為生無將畧酬時望死有忠魂報主知祇美羊頭增偽爵誰令馬革裹還屍清流他日春秋筆可道從容取義遲腹背憑凌進退難權輕餉竭又兵單不聞糧運微袁術况復師期斷賀蘭掣肘忍令時事壞撫心惟覺主恩寬燈前莫訝人憔悴一片孤誠早化丹西指鄉關一淚流虛疑紫閣化丹虬原註余生時曾祖母周太夫人於是夜夢赤虬自天而下入於戶生而有鱗書聲出戶兒雙讀柳色當樓婦對愁階下荆花常合蒂堂前萱草自忘憂九泉拜父應含笑兩代清名萬古留經志十載馳驅戰伐塵嘉名深愧拜恩綸談兵徒負傳詩並外集入卷未知能存否家國艱虞空涕淚乾坤維繫祇君親少年解脫無諸相欲叩違臺問夙因附潘羅成湖南溆浦人一足微蹇有勇敢戰軍退常殿後賊有追躡者回戈奮擊輒轉敗為勝積功至參將得伊勒爾克巴圖魯名號咸豐九年從李孟羣拒賊於廬

江之長城力戰陣亡於同治元年得卹附祀廬州府李

孟羣專祠憫忠草奏案同時陣亡者衛守備馬錫祿山東德州人

守備朱清珍河南許州人千總梁志品四川安縣人康玉麟四川華陽人

州同張湘甲湖南人經歷周壽嵩湖南衡州人縣丞沈麟圖

河南固始人從九品喬傳芬湖北孝感人敬克猷四川成都人周德治

四川忠州人監生趙廷煥江蘇蘇州人文生張之瑾從九品銜周日

襄固並河南人千總倪人傑四川成都人張首魁四川大竹人張玖乾

湖南保靖人孫全勝河南人把總謝世望四川成都人黃占魁四川大竹人

外委原得勝廣西桂平人劉啟光廣東番禺人向宏亮包宏興

並湖南永順府古文坪人軍功魏鵬九湖北沔陽州人均奉

旨予卹附祀袁甲三奏案

續修廬州府志 卷二十六 名宦傳一 堯

福濟字元修滿州進士咸豐四年由漕運總督調授安

徽巡撫時值廬州失陷前撫江忠源殉節之後福濟草

創軍旅收集潰散與提督和春鄭魁士等勉圖恢復踰

年攻克廬州府城又迭克含山舒城三河巢縣廬江各

城隘在皖五年為江北保障嗣由西甯辦事大臣調任

烏里雅蘇台將軍緣事落職其家屬俱在馬城殉節福

濟回旂後以積勞病歿光緒元年奉

旨照巡撫例

賜卹李鴻章奏案

翁同書字葯房江蘇常熟進士由編修洊擢少詹事咸

豐六年幫辦德興阿軍務復揚州江浦浦口擢詹事七

年克瓜洲以侍郎候補八年敗賊六合復來安授安徽巡撫督辦軍務尋

命幫辦勝保軍務皖境各軍均歸節制同書移營定遠派兵復天長疏請嚴禁徽甯等府花會以絕亂萌三月六安陷賊犯定遠勝保出戰同書夾擊大破之進復六安六月擒匪龔得撲定遠城陷同書移駐壽州疏陳練兵選將裕餉事宜派員剿撫潁屬民圩十月以賊踞明光集淮鹽不得渡河請令皖北暫食蘆鹽又以皖北糜爛已極疏請補救三策報

聞捻首孫葵心圍潁州同書派兵剿敗之乘勝攻髮逆於霍山復其城十二月髮捻合圍壽州擊卻之十年正月焚定

續修廬州府志

卷二十六

名宦傳一

四

遠之爐橋擒壘進擊舒城破王家海賊圩尋疏陳鹽利開屯之策並屯田六利旋攻拔程家圩收撫捻圩六十處逆酋陳玉城圍壽州擊退之密陳機務四事續陳五事

上躉其言十一年

召來京以失守定遠壽州及紳練仇殺之事於同治元年

命褫職二年戊新疆三年都興阿奏留甘肅軍營四年有花馬池之捷旋卒於軍開復原官

贈右都御史諡文勤

史館鈔傳

李續宜字克讓號希庵湖南湘鄉人師事羅澤南從之募勇援救江西遂參軍事以功累晉知縣



賞戴花翎同知咸豐六年冬湘軍再克武昌漢陽巡撫胡林翼奏續宜有勞特爲兄續賓所掩有

詔以知府選用

賞加道銜既而隨續賓圍攻九江明年遂偕諸將圍攻瑞州會皖北羣賊上竄蘄黃乃自瑞挈千七百人回救湖北師至黃州與胡林翼并轡謀野周覽形勢自巴河蘄水廣濟黃梅六戰破賊壘無算遂會克小池口既率所部集九江續賓乃得以其間分兵克復湖口連下彭澤小孤梅家洲諸城續宜獨以偏師卻湖口之賊禦竄麻城黃安之寇續賓乃得專力破賊九江咸豐八年續賓殉難三河將士死者六七千人續宜在黃州哀迫之際經緯

續修廬州府志

卷二十六

名宦傳一

聖

萬端入則損食悲咽出則拊循潰卒思鄉者還歸願畱者編伍哺粟賜食接以溫語部署粗定適鄂撫胡林翼以母喪奉

詔起復相與申徹簡練湘軍復振明年夏賊石達開竄擾湖南圍攻寶慶續宜新奉荆宜施道之

命統兵自鄂援湘

朝廷壯之師抵長沙進自資水之西四戰而解寶慶之圍論功

賞加布政使銜當是時曾胡二帥方議并力規取安慶省城今兩江總督曾國荃與將軍多隆阿分圍安慶桐城續宜自湖南東還駐軍兩路之中曰青草橋者大敗逆酋陳

玉城於挂車河布陣之廣近世罕聞旋擢安徽按察使  
賞二品頂戴十一年擢安徽巡撫續宜具疏謂逆酋圖解安慶  
之圍悉銳西竄必犯湖北湖北爲眾軍根本臣宜提師  
回援不能遽任皖撫之事比馳抵武昌而賊已陷黃州  
德安兩府五縣其別賊自江西至者又陷興國等縣經  
營七月始將列城恢復安慶亦克同治元年褒安慶功  
賞穿黃馬褂調補湖北巡撫既又

命駐湖北安徽交界督辦軍務旋調撫安徽

命幫辦勝保軍務續宜初莅安慶繼駐臨淮屢奉

旨以苗沛霖叛服無常詢問剿撫機宜續宜覆疏謂苗沛霖官

至道員公犯不韙圍撫臣於壽州陷其城屠其眾乃復

續修廬州府志

卷二十六

名宦傳一

三

詭言求撫此豈足信不過假稱反正號召近縣養成羽  
翼若正彼叛逆之名人人得而誅之寬其黨羽使爲我  
用彼勢日孤終成禽耳

天子憐之續宜又以時解潁州圍克霍邱之城撫綏各圩陰散  
逆黨選任賢吏安民墾田功緒漸彰

詔授爲欽差大臣督辦軍務旋丁母憂疏請奔喪

朝廷命仍署理巡撫三疏陳謝始奉

命賞假百日回籍治喪續宜夙患咯血至是增劇歸里後六奉  
詔旨起復墨經視師乃以嬰疾轉篤請假四十日調養既而興  
病就道又請假四月

詔召相銜至冬初再疏自陳病狀以同治二年十月二十八日

卒於家年四十有一

救照總督軍營病故例

賜卹三省建立專祠諡勇毅

史館鈔傳 曾國藩撰碑銘

英翰號西林薩爾圖氏滿洲正紅旗舉人咸豐四年以知縣揀發安徽歷署合肥鳳臺霍邱宿州及鳳潁同知事先後破平合肥賊壘收撫宿州賊圩各數十處同治二年在宿州任內收撫劉天福等又生擒巨捻張落刑并其子張禧升補潁州知府加道銜苗沛霖叛圍蒙城率軍赴援攻克丹鳳集連破賊踞之穆家張蔡等圩署廬鳳道接統蒙亳諸軍攻澮北賊圩破之復派軍助守蒙城別克高爐集斬捻首高加苗逆攻撲小澗集渦河

續修廬州府志

卷二十六

名宦傳一

聖

南北營潰復會軍疊破賊圩斬逆黨慕玉宗奉

旨英翰在皖素稱得力令認真防剿旋隨僧忠親王分路進攻苗逆伏誅升授安徽按察使率軍扼雉河奉檄越境解湖北麻城之圍追賊六安霍邱間克金家壑緣前事被議奉

殊筆改爲降五級留任旋升布政使派軍敗賊於土門河楊柳灣漫水河黑石渡收降黃忠庸等三千餘眾於時潛太英霍肅清

賞給鏗僧額巴圖魯勇號四年賊陷高爐集團攻雉河英翰侍在圩中夜率二十八騎突出至蒙城率援軍由果家圩李家樓進克高爐集會軍破賴汶洗牛老紅等於渦南

破張總愚任柱等於渦北雉河圍解自是擊賊於王家橋黑虎廟等處皆勝之五年賴逆等竄潁州會軍由大橋集進剿追奔至薛店逆眾復走宿州懷遠渡渦掠下蔡又迎擊於陶王集棗木橋均大破走之旋升安徽巡撫布置各處河防六年派兵四千人援陝西簡精銳萬人赴山東會剿丁父憂疏請守制奉

諭墨經從戎改爲署理巡撫督軍馳赴運防敗賊於宿遷匪首劉淮王鳳等先後投誠復於盱眙擒獲僞目李允正法皖境肅清疏請回旗終制時張總愚竄擾畿南奉

旨將此股賊眾蕩平再行扶柩回旗遂親督將士會湘淮各軍困賊於黃運間事平

續修廬州府志

卷二十六

名宦傳一

四

賞太子少保銜輕車都尉世職八年穿孝假滿回巡撫署任是秋安徽水災籌款賑濟並借給各屬修圩經費九年服滿奉

旨實授自此至十三年先後拏獲匪犯甚多合肥劉孝窩子舒城周炳和亦在其中光緒初升任兩廣總督因事落職旋授烏魯木齊都統卒官

贈太子太保銜

賞還勇號花翎照都統軍營病故例從優議卹

子諡果敏

賞銀二千兩人參六兩以慰其母并於皖省建立專祠

通志采輯

方畧奏疏邸報及太湖阜陽霍邱渦陽蒙城英山各縣志

馬新貽字穀山山東荷澤人丁未進士道光二十九年  
署太和知縣寬猛相濟嘉惠士林太和縣志三十年署宿松  
賑水災宿松縣志咸豐元年攝亳州決斷如流公餘與諸生  
論文講經帶勇擣義門集鄧鳴賊巢亳州志四年知建平  
縣築城浚池練勇籌餉以禦髮逆暇則勸農課士吏畏  
民懷六年卸任祖送者三十里建平縣志旋調赴江北軍營  
在軍屢有勞績歷任安慶廬州知府洊擢安徽按察使  
同治元年授布政使五年升浙江巡撫九年任兩江總  
督察吏安人尤留心武備為刺客所戕死

贈太子太保銜諡端敏臨淮建立專祠奏案鈔存